









**煎学編** 

北京大學《儒藏》編纂與研究中心

#### 圖書在版編目(CIP)數據

儒藏.精華編.二七七:全二册/北京大學《儒藏》編纂與研究中心編.一北京:北京大學出版社,2016.6

ISBN 978-7-301-11995-2

I.①儒··· Ⅱ.①北··· Ⅲ.①儒家 Ⅳ.①B222

中國版本圖書館CIP數據核字 (2016) 第065854號

書 名 儒藏(精華編二七七)(上下册)

RUZANG

著作責任者 北京大學《儒藏》編纂與研究中心 編

責任編輯 吴冰妮 沈瑩瑩

標準書號 ISBN 978-7-301-11995-2

出版發行 北京大學出版社

網 址 http://www.pup.cn 新浪微博:@北京大學出版社

電子信箱 dianjiwenhua@126.com

電 話 郵購部62752015 發行部62750672 編輯部62756694

印 刷 者 北京中科印刷有限公司

經 銷 者 新華書店

787毫米×1092毫米 16開本 88.75印張 840千字

2016年6月第1版 2016年6月第1次印刷

定 價 1200.00元(上下册)

未經許可,不得以任何方式複製或抄襲本書之部分或全部内容。

版權所有, 侵權必究

舉報電話: 010-62752024 電子信箱: fd@pup.pku.edu.cn 圖書如有印裝質量問題,請與出版部聯繫,電話: 010-62756370

# 《儒藏》精華編第二上

下册

集

部

689

## 揅經室三集卷五

### 紀文達公集序

公生其 帝 策 被 好古 河 肩 命輯《四 文約指 服 間 性 比 儒術 夫山 津 實 獻 踵 我 接。 地,起家甲科 縣 朝 事 逮 在 川之靈,篤生偉 賢 庫全書》,公總其成,凡六經傳 明,學者宗之」。後二千餘 六藝具舉 求 後學,則 至於 漢 俊 是,所得 爲 蔚 貫徹 獻王 興,人文鬱茂 歷 河間 ,對三雍,獻 封 儒 書 躋 國 籍 皆 紀文達 人,恒間世一出 一,史稱 旁通 清 古 要。 文 先秦 鴻 獻 雅樂,答 公足 百 高宗 家 才 E 修學 修 舊 碩 年 以 純 書。 注 而 詔 率 皇

所發, 靈,醖 俗。 遇,有 外 富 《公羊》、《穀梁》二傳, 請 禮、恭進 《孟子》、《老子》,厥功尤茂焉。 合,蓋公鑒於文家得失者深矣。公著 有功經學。 王之寫 提要》,多至萬餘種,考古必衷諸是,持論 别 之得失,諸 不 其平,光稽古之聖治,傳於 ,罔不抉 試士子《春秋》文以《左氏 勤 所爲詩,直而 自 所 爲 釀 雍容揄 定《周 疏 搜 頌册,恭 裒 深厚,未嘗規橅 奥提 輯者數年, 集 奏,皆平 史記 他所著撰 揚,有穆如之風。 故故 官》、《尚書》、《 綱,溯源 和聖製、御製 載之異 多 不伉 散 徹閒雅,爲 而 得詩文集十六卷,梓 佚。 婉 體 徹 廢胡 同,子集 前 委,所 物 人,罔 而 公之孫 傳》立論 《禮》、《 披 氏《傳》,尤 不 諸作、皆從 無 公受兩 國家舉 文, 對 佻, 抒 撰定《 窮 之支 不 揚 香 與 不 禮 準 輔 軌 林 襲 分派 述 古 寫 記 諸 大 總 朝 其 心 典 相 性 時 務

儒 然 館 會 下 以 亦足以覘全量矣。 非公不 術之是 ,聞公議 行 初 世 人 都 屬 非, 、公見 能 論 序 益詳。 析詩 於 至於此 元。 元 文流 所撰 蓋 元 公之學在 集, 以 書 派 科 之正 雖 稱 名 非 許 出 僞, 主 公所自 之,自 於辨漢、 公 門 持 生 勒 風 宋 詞 門

# 王文端公文集校本跋

是時 之梓。 稿 李公手校本也,故跋之。 在 口 (葆淳 門 寄 文 友李 、公子已出 朝 王 至江 堂集》若干 梓成,元 文端 風 許 節 西,屬元 師 齋 世 詩 賡芸。 守 匆 卷, 文不 公薨 閩 匆 又 編 郡 手 移 自以 後,公子 矣。 訂 刻 校 河 之。 成《 南 爲重 板 過 年 爰 中 改 堉 譜》 兀 誤 以 蓋 乃 補之。 時 字 板 公所 手 收 卷,付 頗 寄 編 羅 多 閩 重 此 爲 雜

# 凌母王太孺人壽詩序

之儒 非 于 使 年二十有六,貧 孺 太儒 合志 爲 爲壽者,元 人 而 E 蘄 市 就 . 壽 恥 人,某兄弟實 文,書諸 往往往 焉。 塾師 爲 與 人 可 八十有 吾友淩次 昔先 博士 人 方,誼 姓 争 且 讀 君 王 固 爲 屏 弟 利 書 獨 子 宜 氏 若 人 將 學 子 廳 仲, 生於是 恐難 序 以 不 元 所 兄弟, 之謂 無 海 能 依 其 記 與 稱 紿。 官 友, 州 成 自 親 事 次 寧 名 觴 也,必 以 給。 矣。 則 焉 戚 舊 仲 國 姓 於 太 宜從 故 自 交 學 教授。 孤 族 而 孺 知 通 太孺 某 歙 陋 己。 次 久 齋 人 事 太 六 經 客 仲 且 而 次 日 于學。 以 龄 寡聞 立 孺 長 少 人鬻 海 深 明 仲 書 一次 人最 凡 行 元七 年 長 而 州 嘗 來 爲 習 簪 孤 謂 娶 吾 然 爲 以 屬 太 珥 悉。 年 學 賈 有 賈 元 元

善。 謂 時 哉 以 乎 選 交於 次 元 F 應 都 所 於是 尤 汝 與 精 仲 之日 1 試 兄 次 游 識 知 表 1 翁 仲 遂 次 揚 之 見 次 侍 且 縣,投牒  $\equiv$ 與 癸丑 則鬱 次 覃 仲 貧 吾 寓 州 養 於 禮 仲 仲 不 以 溪 亦嘗 韓 日日 如 及 世, 乃 吾 元 鬱與 識 生 己 先 問 汝 城 爲 故 推 挾 吏部 東 西、 不 學 其 生 以 奉 爲 公 王 無 步之學。 書 能 駔儈老矣,烏 海 而 奇 游 相長,各 直 命 韓 庚 無 此 不 出 僻 ,改教授 强 循 其 四 廬 城 視學山 戌 忝 重 游 哂 陔 然 子 才, 方 元 兩 所 朱 次 之 非 改 致 博 榜 生。 期 乾 教 大興 仲 就 往 鄉 冷 養 耐 東 以 通 成 隆 非 以 束 師 别 之學行 貧 官 詣 能 奉 經 進 閉户 未 身 制 辛 焉 兩 友 子 史, 顯 太 母 士。 幾 公於 修 舉 丑 熱河 以 公所得 可 名 著書 孺 願之, 次次 業 行 善 成 也。」 與元 者 於 是 次 人 之。」 行 屬 時 仲 座 天 勖 仲 少 勉 文, 在 士, 其 今 甚 F 之 之 有 訂 中 嗟 天 例

> 負。 何 志 如 趣 爲 他 世 日 ? 何 太 如 至 孺 於 人 疇 太 登 昔 孺 期 砥 人 頤 怡 厲 E 之言,尚 然安之, 壽 元 當 冀 其 躋 始 德 堂 終 教 賦 無 又

### 里堂學算記序

詩,爲諸

交游倡焉

極; 者,喜空談 炫之徒,或步天路 成、賈逵、 知 通 無 紀 之於後,凡 數 以 天、地、人之道 ,群倫之統系也。 乎? 世 效 數爲六藝之一, 事 其 之 靈; 何 愐 自漢 糾 休、 不 在 地 紛 務實學, 韋 以 儒 域 日 繁 而 昭 來 林 儒 之 頤 天 有 而 孰 廣 杜 與 驗 如 類 廣其 非 薄 輪 於 預 許 星 能 謂 數 藝 辰之高 時 商 爲 虞 非 用 儒 無 事 算 喜、 數 則 或 者 劉 以 而 天 著 無 加 歆 提 不爲, 劉 遠 後 算 地 可 以 非 焯 其 之 術 鄭 以 之 步 要。 學 其 而 劉 康 不 其 數

震。 學 宣 有 度 轅 貫 純 明 算 大 口 士、士 城 若 隸 一之道 數 天 皇 數 法 夫 莫不 實往 吴 學 者 梅 帝 留 衰 洞 首 徵 欽 奇 江 心 不 或 聖 各 曉 而 鴻 定 君 此 降 知 王 古 祖 幾 幾 E 有 文 婺 文 及 事 星 最 之。 何 儀 仁 平 所 寶 譔 源 明 鼎 息 高 쁄 者 皇 未 典 象 述 而 代 江 有 以 考 帝 矣。 言 謬 錫 儒 後 愼 流 日 故 也 成 御 測 寖 闡。 誤 者 先 修 布 月 海 我國家 製《 圓 以 相 兼 輩 諸 X 永。 淄 内 昭 者 益 仍 間 長 數 編 出 爲 111 垂 微 不 則 0 理 休 莫 稽 薛 學之士 研 知 田 蓋 有 專 精 閒 寧 能 儀 古 天 極 若 門 度 我 藴 有 戴 理 右 是 甫 元 越 吴 名家 × 朝 文, 庶 數 IE 高 習 平. 算 縣 驷 鳳 常 祚 學 則 綜 宗 昌 步 惠 明 軒 士 П

而 口 於 遊 推 江 長 步 都 同 數 焦 學 君 術 里 尤 里 堂 堂 獨 與 有 湛 元 深 心 同 經 得 居 學 北 比 長 湖 輯 於三 之 其 濱, 所著 禮 小

之説 之説 之; 見 蒙 測 崔 也 然 觕 學 學 弧 而 而 加 蒙 \* 靈 算 偏之見,於古法穿穴十經 創 知 元 疏 至 日 何 減 七 者 蒙 恩 相 嘗 今 記 不 如 几 夫 不 其 卷 乘 政 自 其 稽 合 氣 已 别 合 地 足 中 ×0 陋 除 各 矣。 實 V. 道 ^ 考算氏之遺 而 反 3 9 爲 之 釋 歟 書 釋 于 大備 義 有 光 熊 月 圓 與 乃 橢 成 然則 之 以 本 食 \_ 八 體 西 彊 是 W 而 渾 天, 里 差 拔 卷、 人 9 生畛 中 而 屬 中 堂 蓋 則 枝 卷 於 簡 與 西 談 ^ 元 之與 而 文, 條 爲 平. ~ 會 地 天元 域 兩 西 郄 曾 序 總 姜 通 儀 景 雖 汎 安 學者 家 岌 萌 之。 子 矣 西 而 説 分 兩 覽 遂 研研 不不 已云 日 與 録 > 所 9 家 寓 釋 歐 多 + 之, 張 月 而 的 輒 兀 求 之 渾 同 邏 異 篇 不 本 地 舐古 思 谷 m 衡 = 名《 長 者其 於 之 同 中 榦 卷 毁所 有 蔽 附 天 四 V. 之論 述 已 則 游 方 天 文 里 於 法 ^ 名 作 爲 主 氣 算 堂 釋 不 地

最 通 事 略 以 潤 不 精 論 説 折 里堂之説 日 包,簡 天文算學者,國朝 以道 遂 意 月五 ,闡其 精,今里堂之學似有 涉 爲 中 廢。 斯學,心鈍 儒 ,扶以文義, 昔蔡中郎撰《十意》未 乎 流 術」者,非邪? 星本 劉 而 隱 算,不 今見里堂成此書,敬 之典要,備六藝之篇籍者矣。 不 祕 氏 天之果爲橢 遺 徽 前 心,典而 不能 屑 之 潤 日 屑 注 月 以 以 入深,且 舉 ^ 有則,所謂「扶以文義 過之無 然則,里堂是記 五 九 道術,著成篇 來惟泰 夫數,而 星 章 員 之果 竟,上言「欲 ×0 與 以供職中 不及也。 州陳編 且樂焉。 不 西 數之精 有 法 則 1 章」。 隨 修厚 存 輪 固 外, 元 意 思 事 吾 而 與 耀 鄉 將 惟 斯 小 無 今 立 夫 不

### 舊言堂集後序

昔陸士衡觀才士之所作而得其用心

尤深《 習,屏 能事 以 凡 者 爲《舊言堂 學者誦習,得研 衆長,不泥 古人用心,靡 唐 以 又其古今體 上溯初唐,下沿 陋 良 四六叢 師 也。 趙 也 前 以 亦備 文家 心 用 其 選》學,擎 宋,文體 昭 學者身處近代,遥隔 力所 心 所未 話 吾 明 之 集 古 師 》二十篇,各 觀 於 詩,托 詣 地 不 鳥 知 而 之, 斯 四 變遷 略 指趣。 南宋 觀 執 弃 觀 虞 程 卷。 之 口 今,不矜 覽 能 跡 劉 孫 元 以 一、士衡、 謂 實 籍 松 抑 中 諸 百家書集 - 勰, 今哲嗣 難 審 是 見 窮 列 唐 友 端 所 矣。 以 門 先 源 心 擬 今 衷 昭 靈 濡 蔽 前 委,冠 志 生 生 議 而 以 復 明 自 均 夫 徽 墨 實 廢古 謹 舊 風 學 享其 咸 裒 體 衆 兹 以 灑 同。 非 博 爲 被 雅 刻 以 翰 裁 降 具 體 以 能 後序 教 敘 文 降 兹 殘 所 文家 夫且 兼 所 何 逆 大 澤, 篇 雄 稿 撰 擅 其 素 覩 李 同

## 緑天書舍存草序

間 遂締 枯于 傷 相 裴 泊 節 始見裴山前後數 日 吾早 此亡兒之詩、需 悼,故 德 余 ,天子方重 Ш 榜 栖 母 容,程· 姻 出 成 太夫人,太夫人既 和 亦 裴 識 焉。 者 出 使 進 Ш 余 於 雲臺,雲臺 在 士 頗 撫粤、楚,遂不相見矣。 丙 錢 飾 太夫人慎于擇壻,松相國 外,裴 太夫 多 午 中 用 終之典 歲 丞 翰 之, 彼此半逸其稿。 十年詩筆之全。其詩 入京 雲臺 人 山直軍 林、登堂拜 幼 而裴 與 八手一 有加 勤 師 訂之。」余受而 吾子善,且 于 見祜,甚 Ш 一機,相 囊付祜 蚤 焉。 學, 遽 相 以 母 工 友 裴 病 見爲 益 善。 於文,孝于 愛之, 庚午、 之母 枯致 Ш 中間 卒。 相 有 譽余子 稀 讀之, 愛 己 佳。」 風 天 辛 以 日 日 重 西 格 女 子 及 未 .

> 嘉 酹 俄 與 散 其 作 曙,古人所哀。 卒,又四 有 冉 母 清 裴山 心 酒 爲 嗣 慶 傳,復删 孤 至 超 一言及于兒 悲 翰 歲 生 子 勤 跡 性 林,曷嘗有一言及于外省官,又曷 戊寅十月 居 承 從 奚 朝 年 情 而 京 志 中 可 存 陽之桐 縝 不 而 師,嘗共 預 其 來。 盬 密 俾世 太夫人卒。 女子? 微雲抹 計 詩 序于 于 粹 萋 哉 ,編爲六卷,刊于 存 王 守 然 殁之情,結于涕 乘 事 羚羊峽 ( 萋 盡 之。 想 山,賤 乃二十七年 敝 可可 當 見 車,以 丙 其 力者矣。 鳴 嗟 謂 舟 午、 子 爲 呼 乎 泰 中。 何 1 丁 ! 文 Ш 忝 之竹, 藝 未間 廣州, 余既 0 而 裴 泗矣。 相 生 書成 星 裴 Ш 後 Ш 余 畀 爲 將 冉

# 孫蓮水春雨樓詩序

上元孫君蓮水之詩,蓋出于隨園而善

識 外 作 清 也 肆 者 昧 學 己 人 H 隨 然 以 授 而 無 所 蓮 東 者 亦亦 隨 正 隨 所 故 者 麗 蓮 冬,又同 水 軌 即 有 袁 從 水 爲 以 袁 而 寧 有 以 必 而 于 者 之才 來。 亦 爲 肆 隨 則 新 隨 有 未 面 性 歷 敢 動 詩 也。 焉 袁 袁 善 警 醇 所 情 唐 肆 謂 F 必 所 力 爲 學 蓄 亦 而 而 人 以 IE 語 其 蓮水 蓮 大 深 武 不受 肆 隨 於 同 本之以 而 Œ 爲 必 0 詞 水之詩 矣, 賞, 林之遊 詩 者 袁 爲 詞 逋 軌 出 從隨 加 也 者 之中 隨 蓬 使 門 有 峭 氣 也 于 遺 袁 也 萊 性 一代 學之者 醇 其 隨 徑 袁 非 \_\_\_ 吾 情 觀 一游,奉 且 袁 廣 醇 出 朝 字 詩 乾 吾 與 海 師 矣 不 未 焉 于 擴 中 蓮 隆 固 其 清 而 之 不 也 荷 之以 安,吟 隨 蹤 水之爲 Z 其 日 肆 才 有 游 以 隨 善 作, 袁 跡 卯 . 于 所 爲 袁 益 醇 不 之 不 游 春 論 詩 想累 不 略 嘉 此 出 不 其 而 敢 詩, 口。 9 Ħ 歷 慶 多 受 子 唐 之 于 所 肆 11> 所 口

> 見。 不 爲 見 書 之久 數 1 語 戌 矣。 于 夏 卷 五 今春 首。 ,蓮水歸 秣 雨 樓 陵 秣 中 Ш 陵, ·, 詩 水 訂 境 清 相 春 麗 似 而 RI 壯 樓 爲 詩 子 掩

福謹案: 蓮水,名韶

卷

凝

思者久之。

## 華陔草堂書義序

定 若 覽。 封 策 以 經 第 術 以 兄 擬 自 經 弟 精 乾 八 名於江南,及從錢辛 今平 之 史文 第六人始 博 隆 忧 X 求 湖 中 丙 辭 . 庚 士 午 令尹 式 此 戍 於於 秋 披 相 V. 似 石 朱 嘉定 華 是平 見于 湖 擷 YI 君 石 寔 南 實 李 師 湖 君 春 第 李 同 六 楣 總 以 師 六人, 明 許 年 裁 第 典. 書 前 齋 性 四 許 試 輩 會 九 試 情 人 遊 齋 數 大嗟訝 江 及 學 中 南 揭 早 會元 靡 盡 術 ·式,元 合 年 曉 不 得 拆 既 綜 契 經 其 以 総数

聲 義 程 人 有 戒 出 義 吾 史 拆 大 法 馬 聞 中 師 爲 以 爲 盡 第 比 律 養 都 孝 之 具 之所 根 下。 之中 實 也 且 也 見 人 抵 全量 讀 以 德清 可 乃 兼 <sup>令</sup>白 取 斯 爲 毛詩序》曰:「《 於 歙 工 士 文者 平 近 華 書義見之矣。 朱 漢、 然則平 , 吾友之所以受知 時 蒼 ×, 湖 獨 晉 孝 楣 當 闢 古 文 知 子 縣 湖之全量 之 翰 文 之潔 寓 **令** 徑,未 南陔 經 酷 蓋 平湖 以 白 疏 蒼 似 潔白 × 史 也 不 口 楣 皆於 W. 事 志 孝子 以 口 亦 湖 養政 母 尋 于 斯 以 以 孝 常 明 文 相 書 書 經

# 王柳邨種竹軒詩序

T 爲 之下。 卯 間 子 昔 相 既 聞 遇 乃 翠 干 爲 屏 揚 翠 洲 州 屏 E 讀 洲 君 所著 之 名 1久矣。 游 詩 洲 驚 在 異 歲 焦 之,心 内 Ш 寅、 北

> 也。 之。 徵 數 必 明 情 瀟 復 與 君 無 美 E 到 岸 八太白 詩 爲 S) 所 子 相 遠 性 四 以 選 門 春鐙 桃 似者。 于 名 傳 王 耶 眞 子 千 癸 訂 置 由 柳 君身 集 屋 人。 軍 酉 餘 本 摇 才 昉 詩 耶 IE 數 後 年 艘轉 家 春 朝 焰 字 雄 也 ? 萬 人 夫 是 處 相 詩 以 讀 尚 株 氣 於 乃 運 集 蓬 摩 會 將 王 誌 集 静 雜 幼 此 此 是 畢 歎 于 茅, 君 詰 毋 家學。 哌 于 後 間 詩 己 其 將擬之古 揚 之 當 司 復 耶 间 子 曲 名 安得 I 洵 至子夜 以 子 出 刻 舟 江 滿 嘉 詩 有 江 馳 竹, 板 復 亭上 泊 海 州 柳 異 驅 -於 有 不 高 人 以 内 歎 邨 于 南 晚 蘇 佳 異 布 明 同 跡 貽 時 詩 北 此 製, 唐 州 寺, ? 其 其 罕 訂 選 冒 俗之所爲 ^ 衣 後 耶 靖 體 别 至 江 曷附  $\approx$ 夜 詩 於 而 擬 裁 數 節 抑 蘇 徵 是 N 屬 江 老 年 IE 耶 録 子 瀟 序 詩 相 潮

### 邗上集序

客則 散 袁 集 也 不 見 氣 閱 王 1 之人 間 <del>一</del>, 一,徒 各家 惕 中 具 側 人 僑 甫 有若 體 論 物 出 兀 Щ 故 餘 以 格 則 詩 、樂蓮裳 曩 休 居 宅 聚 近 口 掩 袁 吴穀 輯《淮 有若 集 藴 揚 年 쨻 知 書 卷 池 于邗 園 藉 州,勒所得 馬 矣。 瓏 好 凝 觴 白 人、 沈既堂、江 如 諸 氏 海 客 想, 詠 上 漁陽。 胡 玲瓏 英靈 沙、翠竹、江 君 石 1,扶助 觀 如 每 子 事 西 察 猶 將 藉 遊遊 庚、 蹟 Ш 集 工 詩 得 風雅 在 當 見 館 特 子屏、 洪 詩 讌 爲 歌 揚 之。 《揚 時 材 詳,未嘗 善 之 稚 于 州時, ,迄今家 名 村各園 地則 卷, 書 存、 松嵐 力非 州 楊 明 家 圖 竹 代、 方子雲、 甲 别 日 有若 相遇之 甚 觀 不 經 廬 子 亭, 集 貧 邗 饒 或 歎 察 江 篠 相 -Z 詩 書 健 疊 初 風 翻

> 之得 文叔 諸 各家之詩 人詩 舊家。 也 ? 詩 甚 余 之 故 H 以 以 幸 邢上 此 涆 專 上 勒 加 不 集 得 甚 名 歟 陃 也 尚 抑 邗 得 屢 \_\_\_\_\_

福案

觀察劉

大觀

邱

「縣人。

#### 惜陰日記序

詁 者,束 史古 能 都 咸 氏 也 儒之自 风熙,潛: 以以 在 似似 若 党 是乎? 身 所 精 河 漢 有 遁 皆 間 修力學,丙辰、丁巳間 脩 書 著 合于 舍 于虚 No. 獻 中 行 據 惜 王 「實 實 爲 好古敏 陰 竟 而 以 前 事 脩學 日 争是 逆 求是,非沈 求是」之教。 記 料 輩學者。 求, **>** 好古, 非 而 相 不 知 于 質。 立門 之乎 不 實 1,助予 篤 미 其 嘉 事 澹雅之才, 户 ? 間 慶 究 求 纂 詰 考 辛 和 不 是。」 我 訂 之 未 集 宋 涉 朝 境 經 經 氏 後 儒

## 存素堂詩續集序

其《年 先 雖 先 收 亦 後學之式。 又 加 勞 生 卒。 生子 删 于 具 靈 带 譜》 定 迴憶 積 良 中 隱 帆 史才 書 先 ,附于《續集》之首。 牘 書 一卷,乃先生子録寄 感感 平 桂 生 藏 十餘 馨 詩 生 主持 先生之誼 以以 學問 後 前 年交誼 稿 集 集》未校 詩 交游 寄 \*, 派, 江 元 9 傷悼 亟 衷于 爲 西 敦篤 刻, 爲 屬 之 雜 雅 刊 稿 校 訂 而 靡 不 閲 ĪĒ. 敘 於杭 先 己。 丽 一,足 成 付 生 桂 刻。 卒 州 元 爲 馨 念

福案: 時帆,翰林學士法式善。

#### 是程堂集序

予於浙西見文筆三人, 曰陳白雲, 曰查

士 于 聲。 即 成 達 益 棉 難 邑 大 以文學掩 伯  $\equiv$ 風 則 伯 横 一,裕 吴 其 聞 蠶 獄 江 X 揆 人 宏 集 骨 揆 孟 之濱 Ш 所 翰 皆 于 桑 是天將使其循 不 文 麗 如 日 讀 耕 采 以 遠 林 願 館 矣 知 昭 昭 也 屠 北 不 方。 壯 舉 書之時。 織 爲 矣 閣 力 聚 孟 孟 出 年 以 進 復 政 才 爲 斷之。 邑累于 武 接 昭 昭 于 歲 士,以 政 其 也 教, 也。 學 + 淮 其 改 廢 月 政 擒 河 于 白 加 知 閒 余雖 其學,且 良之政、早及 也 余早 成 乃白 治之。 税 舉 白 邑民貧且 雲 縣 民化之。 繁 矣,而 年 孟 雲 文 人 抗 劇 儀 識 所 雲 就 雖 而 筀 微,吾 顏 昭 難 孟 治 以 其 民 少 知 友 清 其 自除 治。 進 然 昭 之 所 閒 惰 縣 丽 于 古 邑 文 孟 今邑 之 邑也 于 縣 孟 士 以 波 伯 頌 拔 筆 有 之。 孟 民,不 授 才 瀾 爲 聲 揆 俗 復 鹽 昭 各 昭 昭 學者, 民 與 知 老 日 裒 梟 著 故 以 邑 領 地 成 伯 學, 也 騰 縣 成 伙 有 其 木 此 徒 處 循 進 揆 H

與年 戌。 知 其 ·俱進 自 循 今 政 ,烏得 以 親 往 切 以 政 不 此百里地、十四 績 誣。 文 學 弦 \*,懋 序 其 勉 集, 益 卷書衡 L 在 者, 于 量 甲

福案: 孟昭,名倬

之耶

# 徐雪廬白鵠山房集序

卓 之,知其幼被賢母苦節之教,是 徐 易 母: 以 潔,不移于 母 然有 雪廬孝 淪 節 既 召 之 于 激 長 昔 成。 草 張 m 厲 日 廉 木,貞 . 楊 得 而 俗 子 其 嶯 袁 成 孔 詩 駢 Ш 其 先 昔 苦 體 矢 學 之 孟 生 者 文 正 者 傳 祇 幼 覽 口 得 音 构 多 勒 而 孤 齊 自 而 矣 家 異 貧 于 古 持 其 1 無 金 梁、 受 雅 才 孤 父 石 贵 以行誼 業 初 裁 根 兒 哉 非 既 唐 危 于 也 清 席 面 之遺 ! 露 其 遠 豐 文 屢 武 日: 峻 筆 試 康 者 得

> 詩》曰 筆 立 交 弦 無無 遊 既 序 忝 廣, 其 所 白 生者。 集,豈 乃 華 莫 朱 粤,被 不 在 予 知 文 昔 爲 筆 于 所 賢 出出 哉 以 母 試 薄。」予爲 之子 雪 束 廬 廣 , 者 克 微 雪廬 在 自 ^ 補 文 樹

誦之。

福案:

雪廬,名熊飛。

## 郭書屏鸛井集序

其 名 其 然守 於 郭 口 一,得 先爲 滇 鞫 君 典 令中 拊 文誌。 余在 海 其 海 之 夫渤 中 信情 ·有學者,未 上 浙,與守令言 閩 多 其人 無酷 澥 汎 盜 循 舟 之大,昆 聲。 也 悉 枉 之 者。 役, 知 嘗 郭 鄞 其 君 不知之,鄞縣令郭君 爲 民 池 近 余考 鄉 閨 之 海 事 乃 語 中 遥 奉 疆 績 無暇言 進 極 以 總 卓異,薦之。 劇 士 督檄 故 其 一,子 於 鞫 「詩文。 遊 海 采 盗 每 矣。 其 4

六三八

井」云 所 所 游 爲 詩 乎 鵬 之 爾 所 雅 摶 道 摰 鵾 之 實 所 事 徙 求 是 乃 可 亦 以 足 擬 以 之 紀 鸛 其

## 靈芬館二集詩序

讀《 書 第 肖 情 與 吴 可 人 余 江 則 于 與 詩 唐 惟 列 事 相 郭 靈均 流 吾 各 傳 以 亦 讀《 派 君 識 成 一之人 夥 文 而 各 之騷 頻 于 流 靈 矣, 殆 靈 得 蘄 伽 定 派 芬 深 氣 名 全 多 至 香 于 類 臞 館 滿 即 于 唐 亭 于 子 騒 性 而 詩 天 以 上。 繙 人 不 者 清 體 日 爲 詩 奇 讀 朽 : 平 物 集》 如 百 香 其 亦 全 滅 不 鶴 無 出 夥 爲 唐 撲 而 或惜 然, 所 如 矣, 于 詩 地 益 已矣, 玉 不 詩 騷 有 也 子 新 不 其. 有 亦亦 之 白 悟 未 自 久試 屑 舊 人 何 無 見 屑 抒 ~ 眉 此 也 借 唐 其 繙 未 求 不 宋

> 具 芬 人 度 者 焉 所 者 諸 宋 實 人正 歟 先 多 填《 郭 生 君 所 蘅 所 音 廣 爲 夢 「卓然 推 涉 古 重 詞 歷 文  $\approx$ 名家 ^ 辭 殆 亦 浮 交 雅 眉 乞靈 游 久 潔 樓 爲 奥 詞 Ш 于 E ×, 麗 Ш 騒 蘭 清 芳 有 而 泉 婉 草 古 揚 穎 吴 其 人 所 法 清 穀 助

福案:頻伽,名

#### 重舫绿序

河 分 勝 民 會 所 録 其 達 著 B 園 地 以 殷 也 亭寺 揚 以 富 振 而 州 翠. 揚 便 載 觀 畫 益 之。 艾 州 華 舫 風 門 塘 府 南 録 土 治 爲 以 于 巛 **>** 人 ^ L 是 在 + 新 物 恩 方 綜 江 八 城 澤 ,仿《水 寺 淮 卷, 蜀 北 稠 至 出 録 閒 儀 疊 長 ×, 徵 平 經 春 土 士 以 李 山 注 橋 沃 日 君 北門爲 堂 爲 以 風 諸 艾 例 文 淳 草 塘 名

之閒 之恩 其 故 塘 俗 於此。 敘及坊市第 或 趙 庚《平山堂志 録 録 西 元 舊 小 諺,此 善 老 \*\ 爲 有 謂 轉運之璧《 四 秦 城 ,始能 因 洵 通 此垂二十年 疑 楊 録 蜀 淮 舫 北 其 或有以楊衒之、 人,采訪 序 爲 扁 岡 録 史家與 孟 録 分 采 録》, 臻 其 深 録 追 蓮 宅,《 及 此 平山 **\*** 略 合 × 分 以 述 花 瑣 盛 于舟 小説 程太 共十六卷。 虹 南 古 往 考 俾 卷。 平江 橋 事 也 堂圖 橋 門 書 事 知 俗 外 人 索于 史夢星《 外 爲《 家 體 吾 凡郡 紀 談 爲《 此 <u>元</u> 市 爲《 所 志 例 鄉 城 事 者 録 賈 元 志 シ所 者 以 承 岡 縣 元 虹 南 (,其 則 老之書擬之者。 别紀《工 乘 兼 相 或 平. 志 東 橋 録 未 元 目 碑 謂 及 家 裁 通 Щ 及 Ě 録 載者 覩 版 仙 受 重 製 也 堂 汪 \* 小 長 昇 讀 段 熈 咨 鬼 在 小 光 東 下  $\wedge$ 安 平 累 咸紀 出 雅 詢 且 詼 志 禄 誉 志 也 洽 艾 爲 服 諧 浩 俗 于 應 西

#### 王竹所詞序

元、 紋 令則 沿 或 賀 於 自 於 窺 其 《樂 自 尋 王 四 删 詞 鑄 派 其流者, 府 明 三十 聲二十八 寓 、毛滂 者, 行 訂 詞 無 雅 以 沂 穠纖 埽 人之作 怪 有 而 詞 來,傳染《草堂》結習 孫 年 諸 乎 × 晏氏父子、歐 冷光翠色,一 去 有 於簡 周 《絶 前即 人。 骫 詞學之不 吴文英、張 小 調 密 骳 **令**, 中 厚 妙 以之名大江 慢曲 從俗 慢慢 蔣 獨 好詞》諸 以 捷、 得 曲 之作 振 以 五 陽公、 望 唐 乃 炎、盧 也。 陳 清 代 演 如 宋人 其 書之遺 允 真、白 + 漾 而《 溪 南 衡 E 張 或 祖 不 所 流 北 子竹 諸 花 先 精 爲 泉、 미 存 石 溯 兹復 宗。 意 閒 盡 者 爲宗, 風 秦 所 莫 高 集 波波 觀 深 或 自 觀

六四〇

於 此 者 乃 福 知 案 其 竹 爲 所 必 名初桐 傳 也 、太倉

### 群雅集序

焦 爲 炫 之 者 與 録 體 其 魚 嚴 吾 赫 論 其 爲 與 實 NA. 亦 碧 滄 恐 宗 Ш 之 詩 出 繁 不 新 浪 昔 海 之 其言之或 時 悖 奇 終 之 歸 也 伯 城 或 北 意 于三百 標異于 未 愚 古 但 以宗 以 E 宗 于《三 選 渚 無 之及,此 君 宗 伯 岐 伯 唐 獨 伯 뻬 非 篇之旨 古 訂 趣 「賢《二 去 交遊 爲 昧 去之若浼 雅 人 也。 淫 集 别 歸 也 宗 之外 濫 **>** 亦 裁 昧 也 伯 持 近 以 以 幾 近 集 集 獨 今 故 歸 此 日  $\approx$ 徧 無 丹  $\sim$ 親 抱 詩 伏 雅 論 數 干 甯 謂 徒 脯 風 殘 家 耳 處 Œ 大 守 海 Ŧ 于 王 守 雅 大 輩 爲 其 家 此 内 君 小 新 之旨 江 拙 IE 近 聲 裁 柳 陵 城 以以 宗。 金 選 用 雅 邨 僞 氣 鯨 執

> 之序。 之草 途 近 後 在 雖 袟 是 匆 之蹊 是。 時 爲 著 ,名之曰 示 門 先 録 遽未 徑 蓋 輩 元, 逕 或 門 己 之少 友 朝 ^ 徧 屬 户 汎 人 群 讀 别 元 濫 有 録 雅 丽 裁 于宋、 爲 而 其 出 集 折 序。 著 其  $\leq$ 入 以 衷 者 大旨已 作 元 即 後 而 元 乎 以 諸 諸 得 而 將 ? 家 歸 所 家 編 得 之 及 愚 歸  $\pm$ 詩 覽之, 覲 明嘉 宗 詩 焉 君 大 伯 馬 以 恉 又 積 居 乃 首 未 何 隆 亦 成 首 爲 戒 定 慮 前 即 卷

# 重刻宋本太平御覽敘

秦 多 北 至 不存二三焉 宋 漢以來佚書 一千六百 初 太 ,古籍未 平 御 覽 九 千 **>** + 然 餘 其 書 餘 則 種 種 所 存 矣 成 考 弓 于 御 洵 秦 其 太 覽 宇 書 漢 亚 **>** 宙 傳 以 興 間 書 于 來 或 不 之 八 即 可 年 存 小

今此 故 字,即不能存 矣。 臆 更 卷, 同 至 抄 IE 有 余 善册。 無 擅 不 色 過 淺學者 亦依 所謄 刻 或其間 ,古人皆 改,不 本 論 口 録 籍 不 本 矣。 屬 讀 也 滋 宋鐫 乃前 校 子 友 吴 又皆 見 舛 知 者 與 實有宋 X Z 門 且彼本妄據 惜 藉 宋本 爲 古 脱 明文淵 明 所 密 H 是 1全依 黄 世 以 誤 書 活 抄 加 足 所 更 堯 全依 一之眞 文 丙 面 字 謄 本脱 使 行 垂 余 其 甫 義 閣 改之,不 寅 板 校 示 者 藝 所 宋 主 餘 深 不不 間 来 相 朽 誤者 林 彼 本 校 奥 缺 事 刻 知 在 自 似 矣。 偁 能 時 卷,並 有 者 不 黄 雷 殘 明 知 與 但 快 付 見 流 改 其 本 塘 本 人 所 後 刊 重 傳 梓 偏 义 顛 庵 刻 後 使 從 改 世 本 字 于 經 旁之 倒 木 世 Ħ. 改 者 判 各 取 Ŧi. \_\_\_\_ 爲 後 籍 脱 外 委 精 動 反 然 家 明 百 百 主。 世 訛 落 1 校 誤 不 憑 黄 舊 廿 六 鮮

#### 郝 户 部 Ш 海 經 牋 疏 序

禹

古。 於訓 之嚴 問》、《 馬子 入者 功世 河 後 漢 校 鼎 Ш 渠 漢 書 長于《 吴 詁 本 道之古 《書》以 澤 不 莊 則 古 書 左傳》稱 于 氏 地 未烈, 子》、《 口 藝 有 宜 • Ш 廣 理 見, Ш 如《 耳 未 Ŧ Ш 注 治 書 經》 志》 非 景 甚 考 徵 爾 今《 河 逸 禹 然 非 精 此 傳 引 校 怪 雅 周 列 鑄 Ш 徹 上 小》、《神 語 **\*** 書 然則 甚 雖 物 書 ^ 鼎 一精 然 古 怪 Щ 海 末 博 明 不 0 象 海 也 是 經 由 地 帝 敢言之, E 台 農 物 而 丽 經 知 天 經 **>** 賜 會 人之言 本 訂 失 己。 或 且 × 爲 使 尚 景 × 于 草 之 IE 其 與 民 Ш 通 ^ ^ 史家 文 蕪 郭 楚 此 形 遺 111 Ш 知 字 雜 已 景 辭 經 人 書 輿 海 法 象 神 尚 V/ 爲 神 純 相 地 經 家 歟 姦 0 多 畢 法 近 注 相 天 有 口

氏

雜

女 學 試 皋 于 王 日 而 疎 ·, 山 一,博 尚 傳 車 安 益 從 嘉 略 異之 之, 力, 注 鹿 人 經 東 而 字字 春 義 諸 所 棲霞 爲之栞板 不 也 廡 郝 中 書 瑞 著 濫 之 氏 識 尚 人, 玉 間 究 于 粲 拔 有《 ,所著 户 心 此 亦 實 然 以 是 部 經 治 爾 學 畢 傳 經 処 主 著 疏 雅 1 有 並 史 事 疏 也 郝 加 斐 多 詩 氏 以 然 與 諸 余己未 校 經 家 名懿 牋 蘭 書 成 貧 小 IE 疏 皋 章 之 記 行 行 總 共 蘭 精 力, × 修 字 著 皋 裁 余 而 ^ 亦 列 書 妻 爲 會 蘭 覽 不

# 宋本附圖列女傳跋

之《列 同。 柱 此 女傅 若 圖 顧 衛 當 圕 圖 靈 分 中 長 别 公 皆 卷 觀 所 有 坐之 之。 其 之, 中 余嘗 絶 低 衣 相 屏 冠 見 似 人 漆 唐 物 室 否 人 則 女 臨 與 誰 所 此 顧 能 倚 圖 愷

> 定 風 此 畫 孟 也 爲 尚 柱 母 晉 미 爲 圖 人 見 枯 之 中 宋 株 筆 書 屋 之 院 無 之 形 之 形 疑 也 類 ? 且 至 或 恐 觀 于 有 晉 人 其 来 人尚 官 物 X 鐙 室 所 本 扇 增 樹 于 之 石 漢 然 屏 即 如

# 杭州紫陽書院觀瀾樓記

堂。 詩 之空 舫 草 創 處 徑 東 池 0 建 堂 章 折 紫 明處皆 康 E 问 後 池 分 陽 煕 [[]] 巢翠亭 者 -東 高 詠 書 兀 南 有 屋 其 + 水 院 簪 宋 地。 暑 池 ----於 花 日 人 楹 杭 年 南 閣 廣 螺 所 今之 州 白 拾 浙 泉 抉 省 池 今 畝 。 日 級 江 聽 剔 城 南 名 乃 鹽 事 湛 紫 鸚 有 日 登 凌 法 北 然 陽 譙 别 Ш 者 虚 道 向 清 石 有 Ш 如 者 爲 者 高 深 F 天 重 Ŧi. 爲 公 巘 筆 南 雲 樂 熊 F 有 架 春 徵 尋 宫 深 詩 Ш

帶、環 多,附 善乎 言。 皇 樓 游 小者,志小。」朱子之言 可 自 越 祀 建 建 峰 者 知 耳 Ш 處 之地,本孟子之義,名之曰「 於 高 年 海 趙 日 聖言 清遠,澄 矣。 漸 目 亹 Ш 樓 樓 Щ 曲 課者皆給以膏 都察院巡鹽使者延 垂 之最 乃 騰 之顛,俯 F 五 更有 岐 於外 釣 莫大 觀 能 楹 駕 祀魁 (之言 磯 至。」生 上 于 以 而 足 流 冠 者 海 來,雲 於 東下 觀 星 鸚 若 視 者 者 孔 此 日 於 鵡 其 : 城 徒之登斯 難 Щ 有 樓 看 子 石 火之資 馳 風 市 所 爲 潮 然則,學者觀瀾之 --側 萬萬 雷 移 日 足 覽 海 水 臺 公, 之校 動 流 樂 觀 藉 濃 聖 屋鱗 大者 震 游 育堂朱子 臺 ,席不敷 麗 者 爲 因書院 樓者 莫 道 觀 經 久圮 聖 生 大 疊 大 意大。 波 瀾 亭 次,長江 門 徒 又若 八而有 於 ,莫不志 心 濤 樓」。 者 藏 生 爲 浙 神 不 坐, 栗 一徒 難 潮 修 嘉 元 本 江 觀 術 爲 發 沙 如 斯 息 主 慶 乃 日 所

> 豐 有 進 年,多惠 此 於 一,滿 八 1 術 大 人。 道 於 洲 深於經 盈 政。 成 人, 董斯 科 章 家世 之 術 書 乃 T 流 達。 院 者 學 甲 院長 水 教官 行 科 以 教 醇 生 觀 王君 厚 卹 楊秉初、 之矣。 徒 商 以 生 名宗 愛 學 徒三百二 士, 者 使 丁治。 炎, 使 者 亦 蕭 浙 名 將 + 時 Ш 延 操 兀

## 諸城劉氏族譜序

五月朔甲

午。

祖 譜 高 爲 八百二十一人,誌 劉文清公以 ,迨今三百二 門 成 琅邪郡,今屬 第一也 禹貢》曰 以 前 明 翰林 嘉 弘 . 慶十 青州 + 治 視學 海 其 餘 由 故乾 九年, 祠 年 碭 岱 安 傳 墓 Ш 徽 惟青州。」諸 遷 賜 諸 隆 記 + 諸 <u>一</u> 十 城 其 兀 詩 城 劉 代, 遷 有 之 氏 \_ 徙 日一 祖 年 列 共 城 表 爲 宰 在 井 修 海 始 族 岱 漢 相

卷 以 爲館 家之 睦 推 所以 而 愼 譜 漢 秩 矣。元爲文正 爲賢宰相,天下仰 姓,今諸城文正、文清 賢 八唐 族 高 也 謂 ,乘,且 門 特許 相 云爾 屬 師,今大司 奠系 碭 以 何 更足 第, 元 Ш 來 其 爲「海 爲 唐 以 分 而 裨 序。 愼 書 立 將 猶 房 或 字字 也 公門生門下之士,文清 族 相 岱 不可 不本老泉《族譜序》意,亢 農 元不 者 史之表 1 譜之 名 高 乎? 之, 又 相 人,不 門第一 稽 劉 敢 同 世 望。 族 兩 」,不妄推世 氏 辭 榜 是 譜 公非 系表》以 誠 之 口 進 也。 敬書大 譜 嗚 不 望 士也。 不 勝 之修 呼 因 徒 口 數。 烏有先 室 爲 緩 宰相著 一十有 宰 義, 系, 相 今諸 大 于 非 此 相, 而 聖 帝 僭 司 公 今 又 止 修, 五 亦 世 已 翰 Ħ. 其 附 日 何 城

# 岱頂重獲秦刻石殘字B

安縣 貴。 者 + 得 摹 隆 字。 當有感 刻 殘 初 石 常 故 于 年 泰 熟蔣 新 揚 余 碧 Ш 二,尚存 以 秦 州 搨 霞 君 舊 李 清 北 宫 拓本合漢 斯 湖 朗 因 火,石 斯 培 也 石 如 刻 臣 故 在 去疾 嘉 失, 厪 岱 洵 慶二十 延 世 存 頂 熹《 爲 昧 間 玉 快 死 華 + 女池 拓 事,後之 年, 臣 Ш 九 本 請 前 字。 水 碑 最 矣 任 中 口 搜 泰 寶 同 乾

#### 葵 考

氏 風 × 傳》及秦、漢書傳皆恒見之。 葵爲 周 禮 百菜之主,古人恒 醢 人》、《儀 禮》諸 一食之。  $\wedge$ 篇 爾 雅 春 詩 学 秋 . 恒 左 獬

《爾 尺; 高 紫花葵尤肥 大如 花爲 葵術 也。 喻 葵」、「蒸葵」,皆葵類 可食,惟 俗名「錢 曰:古人之葵,即今人 菜,亦無知 食之菜不 韭 不過二 雅》不釋「葵」,其 甚詳, 唐、宋 杯 玩,不 六朝人 、蔥之名,而 向 蜀 兒淑 金錢紫花葵及秋葵葉可食,而金錢 葵, 尺許 此 H 釋 此菜者矣。 以後,食者漸少。 鮑 以 尚 二葵之葉皆粗 葵,高丈 厚 其 高 氣」即「蜀葵」一字 照《 葉充 ,花紫色,單瓣 恒 圃 名 四 但 滑,乃爲古之正 葵 食 Ŧi. 爲 日「藿 食也。 賦 葵 尺, 許, 非 曰「菟葵」、「芹葵」、「 其 然則,今爲何菜 × 所種 故《齊 亦 人 正葵,亦 夏 四 山 有 人 澀 日 五. ,吴人轉聲。 今之葵花 金錢紫花 韭 大如錢 今人直不食此 皆 有 月 開 豚 民 一、「客 毛 知 開 黄 耳 要 韭 葵。 也 花 鴨掌 術 各 不滑 、蔥之例 Ш 色,花 大 者,以 之葵, 此 有 耶 載 蔥 故 不不 花 徑 ? 之 戎 四 不 種

《儀禮 之者誠 嘗登泰 采 滑 《左傳》云: 《齊民要術》稱葵菜花紫,今金錢葵花皆紫 者, 處 畝,種金錢紫花 葉,豆之花亦豈向日 本根之義 其根。」此 無二色,不 有 葵傾 若葵藿之傾 食 無 而 五 異 大略 肥 歧 金錢紫花之葵,皆 葉 于 味 也。」《玉篇》云:「葵葉向 Ш 丽 士 秋 向 其 非 皆言葵之葉能 多 虞禮 甚 須 似 日 「葵猶 葵之葉 駢 美。 、懸崖 地 h 蜀 葉、太陽雖不爲之 》稱 肥 以 之葵, 其 誠 葵具各色,秋葵色淡黄 南中 蔽 窮 花 能 有 之日 大 圃 而 其 谷 向 衛 如 葉 多 翦其 地 轉 根。」 一滑 日 其 鮑 嫩大 岐 Ш 曲 哉? 衛 暖 自 足。」杜 明 中 不 磴 葉 其 者 曹 遠 轉 如 春 自 騈 灶 以油烹食之 根 植 以此。 也 所 錢 夏 予嘗鋤 生,非 迴光, 石 如 日,不令照 即 ^ 謂 秋冬皆 ,乃甘滑 預 之間, 表》 鶴 藿 葛 注 爪 鴨 又余 爲 龒 然 地 云: 云: 也 也 所 無 半 自 庇 豆

六

藿 矣。 不 E 世 種 豆 葵。 能 , 山 正 人雖久不 Л 嫩 相 其 説 中人 葵之花 時 似 時 葉 文》云: 常 益 苗 采 亦 食之, 可 口 其 可 食之,味 開 種 知古 食, 葉 于 食 而 藿 烹 耳 夏 但 人葵、藿 名 食 此 亦 此 豆 Ш 之, 與 美。 則 之 古 葵 但 至 少 地 並 秋 性 葵葉之味 瘦 也。 舉之義。 尚 始 相 耳 有 0 開 近 余 留 嘗 終 其 存 則 葉 非 秋 與 種 者

#### 化 州 橘 記

内 衙 橘 枯 介,尤 以以 蘇 譙 鼓 澤 其 城内 推 者 志 堂 根 賴 爲 前 下 者 氏 橘 致 者 生 爲 東 紅 佳 新樹 佳 爲 中 出 致 老 化州 及聞 城 ,今數十 佳 樹 内 者佳。 鼓之 多橘 蘇 株 澤 年 爲 橘 矣,以 堂 高 致 化 多矣, 前 佳 州 丈許 祇 及 JL 老 以 兩 聞 鄉 故 樹 樹 衙 州 多

> 之 秉 人 數 袁 之,則官不 也 味 亦 錢 復 圃 微 辛, 佳 歟 枚 訪 月 賴 稱 或 以 雖 袁 ? 矣。」 老 過 老 亦 之 識 然 官 示 樹 樹 老 州 然歟? 者入手 或 者 惟 不 其 即 樹 受價 能 云 賴 知 老 多 眞。 以 賴 根 攫 化 叟 賴 樹 數 氏 下 之。 則 能 城 皮 日 袁 花 千 否 守 蒙 辨 : 州 多 之 紅 多 錢 則 此 石之力 之。 袁 蒙 牧 , 有 橘 老 攫 摘 實 中 世 不 石 之。 口 少之 橘 而 白 夫 爲 近 暇 買 己。 賣 業 或 蘇 毛 蘇 老 給 賴 也 年 已 更 澤 戟 澤 樹 叟其 子 買 E, 手,香 堂 杰 堂 者 長 命 于 者 當 橘 數 官 枚 物 惟 僕 庚 就 石 性 若 享 橘 零 辰 官 烈 樹 株 所 + 買 物 而 摘 中

#### 自 鳴 鐘 説

自 鳴 鐘 來 自 西 洋 其 制 出 于 古之刻 屚

烩 奪 綆 弟 記 學 以 亦 置 大 即 壺 水 重 九 小 聲 弟 平 學 也 時 銅 由 屚 以 重 洋 自 由 題 日 塔 其 爲 之 重 鼓 輕  $\overline{H}$ 中 重 滴 也 鳴 紺 香 數 塔 輪 之, 爲 制 太 輪 用 鐘 水 加 圃 鼓 其 珠 篆 之力 輪 學 以 者 器 之 輪 漸 漸 以 中 水 用 奪 術 也 漸 之 中 F 載 減 制 減 日 擊 捩 乃 則 弟 輪 退 力 心 宋 圭 薛 爲 爲 鐘 之 其 凡 漸 輪 塔 \_ 季 輪 輕 輕 表 奇 精 則 以 減 也 輪 中 使 若 宣 奪 也 世 記 螺 器 者 各 前 日 者 屈 心 云 弟 监 C 遂 螺 時 皆 輪 木 輥 是 輪 其 . 鐘 輪 几 自 也 之第 以 形 出 之 之 力, 以 有 彈 重 直 凡 無 鳴 爲 平 晷 如 之,失 力 學」。 力,記 自 輪 物 鐘 輪 古 力 此 卧 屚 不 元 外 鳴 鼓 之 以 之 屚 塔 由 以 有 謂 勝 纏 鐘 而 力 節 轉 其 時 鐵 壶 屈 重 几 鼓 所 之 其 綆 之, 之 運 學 傳 輥 求 爲 盛 直 鼓 中 以 以 理 佐 鍼 者 卷 彈 伸 耳 使 輪 受 奪 以 則 鐵 重 銅

鼓 鐵 力 力 鎚 之力 纏 卷 太 亦 則 輪 頭 亦 與 亦 亦 管 卷 各 礙 伸 其 之 輪 綆 遞 娲 驟 之 其 0 弟三 螺 之 矣 乎 擊 輪 伸 力 輪 力 奪 退 III 轉 以 旋 之齒 力 時 皆 歸 鐘 若 弟 擊 矣 奪 砉 也 綆 伸 輪 也 擊 其 也 五 輪 合 則 弟 漸 然 無 少者擊 者 相 故 皆 輪 力 甚 小 于 時 無 風 解 立 綜 應 有 輪 奪 輪 速 至 塔 兩 以 輪 外 解 其 M 縣 之 之力 弟 無 銅 則 丛 鼓 輪 待 卷 管 理 11 鎚 力 其 使 節 几 擊 之 版 輪 後 漸 皆 其 擊 往 弟 其 鳥 綆 矣 力 伸 版 漸 時 伸 爲 丛 來 其 究 力 頭 頃 由 多 卸 塔 退 五 也 重 摇 合 其 擊 少 輪 刻 者 重 内 或 小 學 輪 而 則 動 也 之 塔 鐘 E 重 以 擊 樹 輪 以 擊 鼓 奪 也 四、三、二 之 力 輪 多 盡 藉 減 而 皆 杙 鐘 益 奪 中 弟 鼓 與 滯 輕 以 螺 弟 以 之 鉛 墼 鐵 弟 面 明 鐵 節 于 釘 卷 其 當 故 錘 畢 六 匹 動 擊 其 卷 轉 之 之 代 則 機 鳥 鐘 輪 外 輪 卷 KK 風

六四八

能 重 創 學」也 也 此 制 乃 古 刻 屚 之 遺 非 西 洋 所

### 清遠峽記

也? 指 狹 趨 連 此 觀 飛 安 而 其 也 來 于 州 寺 曲 知 此 前 别 海 之 踰 二 凡 叱 峽 有 折 然 水 庾 古 水 立 犢之地 圃 此 皆 之 所 嶺 灰 者 亦 寺 分 峽 由 \_ 束 淮 而 L 有 門 ? 流 郡千 兩 貫 流 南 古 禹 則 與 有 Ш 行 至 過 無 謂 貢 流 此 帰 里之水 相 之 清 清 間 岸 分 爲 者 所 己 對 勢,亦 遠 遠 流 古 計 人 著 寒 最 縣 峽 可 水 揚 惟 也 其 故 易 舍 帆 數 呼 出 奇 始 凡 千 留 之 + 此 其 而 矣。 至 南 南 , 古 其 地 間 畝 無 相 M 雄 YT. 不 平 與 由 若 留 誰 在 峽 水 , 塞 田 語 韶 人 今蕪 此 塞 其 水 北 縣 耳。 也 海 州 其 其 肆 舍 有 南

> 是 州 湖 高 歷 江 巨 與 馬, 哉 要 清 地 水 以 贵 盛 遠 縣 形 F 口 或 贵 等 之 也 則 足 之 誑 前 漢 羚 未 浙 間 後 書 羊 余 繭 江 羚 皆 歷 人 . 峽。 于 桐 羊 Ш 耶 地 地 衆 廬 峽 所 ? 里 此二 無 Ш 縣 调 見 志 古 之七 之中 今 廣 × 如 山 江 寒 西 清 ^ 行 之 里 水 耳 遠 而 水 故 瀧 經 省 遽 峽 之 道 注 或 之 斷 最 地 其 水 則 人 皆 此 狹 形 爲 者 未 疑 有 爲 廣 尤 東 有 多 無 池 分

# 新建南海縣桑園圍石工碑記

漸 居 北 厚 廣 海 兩 連 潮 江 南 綴甘 Ш 之水 中 海 之距 數數 縣 竹 所 之 水 共 飛 西 亦 年 鵝 抱 南 漸 兩 各 有 丽 遠 江 洩 小 西 于 泥 阜 海 樵 沙 是 者 Ш 附 盤 始 也 馬 礴 Ш 有 數 面 勢 此 田 渟 高 里 漸 古 丽  $\mathbb{H}$ 患 渟 基 必 西

部

郎

大

息

傷

初

大水之浸 歲 屢 患 實 法 前 堅之隄 洩 多 游 郎 即 泥 東 之海 3 之水 碑 高 沙 粤,是年 得 經 亦 則 捐 韋 銀 南 誌 加 一二尺 銀 銀 不 几 修 察 抱不 一之名。 捍之,烏能 海 積 變 四 六 游 復 萬 不 築 于 知 馬 爲 人 T 萬 夏,水決三丫 是 具 兩 加 復 兩 厚 歲 伍 以  $\blacksquare$ 六 兩 述。 江 北 高 之田 加 田 修 者 衛 元 年 請 百 浩 宋 之未 新 高 蘭 資 于 兩 民 積 不 余 瀚 愈 然 以 之田 地。 會 少, 生。 險 以 險 二三分厚 伍 于 之水 而 後 久 人 韋 濟之, 而 處 乃籌 嘉 盧 元 愈 順 基、民 水水 隄 É 溯 始 潰 皆 芝 慶二 德、 文 難 多 有 也 宋、元 韋 哉 高 建 兄 庫 錦 然 隄 谏 大 香 之泥 命、 田 以 ---石 資 前 弟 炊 洩 下 而 低, Ш 隄 水 游 隄 官 並 發 或 H H 不 明 沙 浸 以 稼 年 官 能 商 朝 且 以 之 新 無 始 T 曈 部 刑 久 以 有 無 生 所 事 以 難  $\blacksquare$ 會 水 占 旨 獎 道

既

下

年

患

則

載

來

不

速

行 善者 受 丈, 之。 捐 Ш 重 澄 仲 坡、 洛 萬 而 一,請 諸 伍 光 銀 内 勞 又允行。 五 江 振 , 護 隄 <u>一</u> 十 矣。 至十 履。 千兩,餘銀還之三 其 地 數 心 元 盧 以 石 吉 何 根 力者, 兼 險 年 + 以 毓 濟三水 二千三百餘 贊 用 萬 終斯 受 者 四 是 里 龄 坊, 以 横 磈 之多 役 其 余閱水 年 如 如 等。 佐 T. 基 石 役 元 衝 題 = 也 縣 竣 貮 諸 護 者, Y 欽 小 志 伍 會 奏, 隄及公事 顧 師出 I 處 之, 定 邑, 基 在 與 丈。 + 同 南 金 鉅 隄 且 保 盧 部郎 共 樂 隄若 五 禾 撫 臺 海 虎 用 請 障 始斯役者,南 上 無 疊 善 年 門, 部 令吉安 叉 多 李 照 --用 田 石 好 奏, 之 可 潰 基 歸 禮 I 德 條 廬 不 施 謂 用。 部 成 過 部 奉 則 潤 石 天 在 千 口〕 郎 躬 好 疊 后 順 刀 建 旨 其 順 不 夫 舉 義 不 用 之, 字 德 廟、 德 坊 允 中 奏 桑 斯 百 銀 願 人 海 丽 例 行 而 樂 袁 潘 乃 龍 復 七 役 \$ 餘 隄 大

幾 隄 + 誡 斯 此 之 隄 韋 章 官 壞 > 中 各 方 士 者 薄 各 險 永 請 增 者 堡 處 臻 之、 紳 厚 樹 勘 安 之, 碑 士 其 脩 定 耆 以 T. 之, 低 焉 老 記 者崇 謁 等 其 磈 海 事 石 自 之, 神 之 兹 書 廟 卸 漏 後 此 致 者增之、 者 歲 付 禱 塞 逢 焉 之, 大 水 庶 壨 石 且

## 恩平茶院硯石記

青 閉 采 廿 石 Ш 此 無 花 不 爲 民 餘 非 復 魚 硯 始 里 嶺 火禁 吾 采, 掘之, 有 南 腦 端 以 恩 今采 冒 青 石 巌 亚. 鸜 端 持 花 日 縣 何 鵒 州 至端 者 南 茶 佳 服 而 石 廿 乃 坑 新 諸 石 州 餘 爾 院 中 色 端 里 端 耳。 産 有 州 與 州 異 老 黄 溪 于 老 硯 新 坑 石 龍 盡 是 阬 I 阬 處 石 端 同 火 見之 幾 人 嘉 有 州 捺 慶 Ш 魚 盡 恩 I 日 腦 初 緑 平. 阬 始 又

記 帶 也 水 者 矣。 余 盡 層 緑 + 洞 及 如 小 規 眼 之。 沂 老院 去 相 之 如 榴 兩 如 石 矩 如 故 又 爰 流 古 端 其 拆 戴 知 疊 皮 蛛 多 石 命 異 彝器 此 石 壁 土 恩 州 絲 種 或 如 外 而 緑 外 者 成 Ŧ. 硯 掘 新 石 種 燕 有 發 無 脈 0 或 以 有 地 大 阬 I 佳 石 支, 形 緑 墨 皮 剖之 冒 皴 皮 巌 潤 買 m 則 或 色, 惜 紋 勝 端 如 或 色 得 出 石 天 而 製 縱 其 于 其 裹 巌 與 松 緑 鄟 滑 成 硯 如 横 上 留 久 新 之, 故 端 皮 如 繩 者 中 橢 相 或 碎 不 冒 其 阬 巖 蕉 線 扁 必 交 或 或 或 泐 發 重 形 端 大 葉 之 +  $\equiv$ 削 斑 黄 有 數 不 墨 色 端 巖 此 異 結 其 年 角 黄 如 如 如 + 相 州 而 則 而 恩 苔 其 龍 等 磽 虎 霜 觔 連 或 之 琢 不 平 端 而 紋 名 皮 錢 葉 屬 形 确 青 爲 自 石 硯 或 石 巖 未 硯 立 緑 或 采 積 使 如 或 如 割 雖 T. 重 所 顯 名 必 數 數 之 H. 氣 紅 于 萬 中 不 少

之即 線,石 也 裂。 今觀各坑 久 即 謹 硯 I 裂 I 記 明之義 裂 指 石 泐 Ē 之日 必 石 從 大 説 水 塊之中 有 文》解 時 線 此水 以 之理。 泐 爲 復 線 有文理 也。 水 則 Ħ Ż 泐 此 凡 理 石皆 字 順 П 其 似 非 證 有 理 有 石 《考 水 擊 裂 裂

#### 蘇 文忠公詩 編 注 集 成 序

》、《説文》互

於 文忠公詩 大成,更可 嶺 南。 余從 編注 E 韓 訂 桂 君 元 集 舲 學 修《宋史》之舛 大 成》尤精 識 司 淹 寇獲識 通 博, 深 於 匪 仁 陋 史 特 和 聚 王 所 百 君 撰 家 文 蘇 誥 爲

仲 處,王 與 東 爲 顧 坡 禧 編 余於接席間 集 君曰:「 也 述 密 中 當 徐 蘇 元 今王 豐間 詩 歷 郡 編 龜 扣 所作 ,坡公遷 年 龄 王君致 注 集 古 不不 注 律 黄 始 力 以 於 於 彭 寄 姓 蘇 施 城 事 詩 陳 德 載 之 初 師

其 築州 瞻 年 出於北宋者也。 爲 僅 中 益之,改『四註』爲『五 人之,是爲 而 難》,謂之『四註 援、李德載 公北歸,有《前 夫」例之,是「希 彭 劉 爲 謂 賜 、任居實、 mj 崇、觀時 共 城 體例, + ,納交於叔 刊 號高 坡 父 陳 公海 七 於 師 載 紹 隱 或 八註 刊 道 孫倬、 程 註 處 興 外 本 行 稱 士 縯 之 詩 後 後 + 四註 「洪 仲 己 本。 於 黨, 次 74 集 初 中 載 兩 夔, 李 而 註 父 公 家 註即「師 編 别 朝 有 五 自 刊 堯 自 也 同 士 註 繼 年 ൬ 創 政 祖 鳴 陳 註 李 使溪 取 時 爲 大 有林子仁者, 註 德 和 張 四 希 之證。 編 有 夫 分 洪 敬 仲也也 上 敬 家, 家。 考子仁於政 仲 年、 類 趙 編 詩 親 溯 齋 則 夫 夔者, 接 註 趙 集 話 見 建 載 五 復 是編 以 次公、 亦 踵 中 己 黄 在 其後 註 載 有 垂 其 稱 於 盡 魯 靖 嘗 復 古 並 師  $\equiv$ 年 注 直 或 納 民 知 和 附 宋 坡 欽 今 内 口

六五

首 Ti. -行 註 甚 初 詳 註 五 故 龃 並 年 叔 編 註 云 子 m 年 而 趙 八 阜 考 龜 夔 註 對 陵 五 夔 龄《 等 註 E 序,其 阜. 集 爲 各 也 註 陵 不 註 之 趙 謂 相 詩 . 變等註 證 牟 序 近 分 夔 V 有 五 乃 則 序 趙 + 刊 云 仍 夔 類 此 定 等 以 即 後 自 分 舊 註 夔 類 閱 爲 得 軾 註 弁 單 八 詩

纂 註 書 用 倚 口 龜 X 編 於於 選 考 监令 成 亦 爲 年 在 用 增 者 後 也 是 註 龜 五 此 輯 六 其 岭《 註 而 諸 龜 有 年 時 力 不 猶 己 集註 六 监令 家 矣。 及《 請 有 七 以 繁 在 外, 存 迨 集 簡 阜 降 B 亦 實 者 至 註 懸 陵 專 圃 伯 惟 由 9 》者 殊 乾 不 以 朝 檢 恭 此 八 道 及《 及 對 力 註 此 + 廣 龜 持 民 龜 是 家 漸 夔 集 龄 龄 爲 + 註 註 註 知 註 亦 ~ 是 家 務 獨 爲 諸  $\sim$ 集 僅 推 考之, 分 賅 七十 將 阜 而 註 有 廣 合, 備 其 陵  $\approx$ 此 不 八 是 排 足 具 與 其 方 今 八

之 也 今 載 類 而 證 其 入《姓 百 龜 均 龜 序 龄令 計 猶 齡《序》 之百 氏 實 存, 其 録 主 所均 人。」  $\cong$ 吕 间 又云: 與《集 伯 本 之人, 此 恭』名 故 又 \_ 註  $\sim$ 自 列 八 集 》分 下 門 註 八 註 註 牆 類 加 > 亦 預 不 夔 加 註 後 符 之 七 + 積 進 分 -自 累 由 者 類 八 至 + 於 類 此

之、 1 父、 爲 北 號 徐 者 潘 器 黄 劉 宋 耆 師 魯 仲 無 胡 E 何 爲 註 舊 直 子 達 言 Ш 邦 長 人 謝 者 骨 可 表 衡 源 曾 洪 無 蘇 陳 知 洪 爲 炎、 逸 公 無 黄 養 劉 者 江 Ŧ 衮、 己 直 通 芻 洪 共 端 汪 几 性 老 父 本、 朋、 秦 + 信 晁 之、 饒 釋 少 沖 七 民 德 陳 張 元 祖 高 汪 操、 家。 之、 儀 體 南 不 釋 子 可 彦 人伐、 仁、 3 軒 韓 潘 勉 巽 章 李 南 出 子 邠 希 申 汪 吕 渡 林 楊 林 魯 9 聲 蒼 老 伯 聖 子 信 敏 直 傳 流 恭 錫 來 李 中 謝 祖 王 閩 西 直 幼 商 學 播 雪的 壟 吕 夏 江 通 老 雲 實 計 遷 均 派 百 居

編 旲 卿 傅 頂 陳 明 年 薦 用 少 9 登 章 累改爲 中 可 可 朝 葉 E 馮 通 籍 壽 計 思 員 分類 及 仲 文 朋 南 閒 宋 進 喻 葉 芮 放 註 叔 飛 或 者 |爲《集: 可 奇 卿 器 爲 知 張 註》之大 者 T 胡 E 孝 = 百 鎮 元 + 祥 任 朋 叔 略 張 孫 鹿 汪 家 忧 器 彦 伯 養 先 忠 可 源 此

註 手。 典引 典。 事 淳、 亦 證 mj 爲 了,又謂 見 著 下云 紹之 經 卷端 施 卷 紀 而 施 事 於 中 佐 史、 德 時 德 顧 次 施 引 助 郎 疵 初 所 初 公間 氏、 子 以 木 議 登 據 絶 大 其 集 顧 集 顧 趙 張 陸 識 텚 禧 氏 外外 孝 夔、 欒 又 博 游 顧 標 該 祥 以 凡 學。 城 原 藏 治 名 禧 程 次 榜 原 序 史 爲 其 縯 標 悉 引 傳 係 係 ^ 龜 概 等 列 載 編 編 經 指 指 监公 不 論 年 註 出 史正 年 句下 題 亦 出 載 作 依 處 註 下 口 五 軱 詩 出 仿 義 施 與 顯 顧 載 --事 處 五. 己 註 註 序 屬 應 始 註 盡 舊 在. 參 徵 徵 紀 人

> 數家 七十 汰其 註 在 定 概 則 Ħ. 集註 宋爲 十十計 + 付 避 可 高即 字大 去, 九 五. 刊 知 一 國 矣。 版 年 E 是是 佐 博 元 小 須 至景 較 以 終於 刊 以 自 七 施 溪所 ^ 者 别 相 宿 此 萬 集 定 載 爲 爲 流 爲 元 則 註 而 千五五 餘 表 季。書 人 ,其去宋刊 E 此 漫 後 元 裹 姚 增 緣 漶。 所 出 令, 百 施 明 雖 劉 乞序 七十 鄭 在 元 顧 無 須 固 符 羽 刊 Ŧi. 不 溪 復 Ł 爲 於 合 時 不 年 内 表 註 計 游 其 淮 请 繙 有 見 · 至 東 體 也 凡 檢 補 須 白 刊 溪 Ŧi. 列

<u>-</u> 後 自 -目 子 1、或言: 查 肆 湘 夏 類 本 九 取 或 肆 重 類 爲三十 分 此 朝 得 類 本 出 康 然 影 分 爲 匣 吴 调 類 類 鈔 F 間 興 非 在 補 施 註 茅 龜 宋 綴 殘 前 本 沿 龄 牧 本 因 明已有 説 仲 III 集 以 至 翁 新安 得 註 編 君 今。 施 之, 年 覃 之 朱 爲 顧 肆 溪 本 面 而 殘 施 得 復 本 目 不 本, 註 省 詳 省 牧 仲 此 爲 t 邵 所 m

《儒藏》精華編惠蒙善助,共襄斯文,謹列如左,用伸謝忱。

本與法師

智海企業集團董事長

馮建新先生

NE·TIGER 時裝有限公司董事長 張志峰先生

張貞書女士

壹佰萬元

壹佰

萬元

壹佰萬元 壹佰萬元

北京大學《儒藏》編纂與研究中心

本册責任編委 沙志利本 册審稿人 陳 新



定價:1200.00元 (上下册)

